



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XXVIII La vie de saint Irenée, Euesque & martyr.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

LA VIE DE SAINT LEON II. DV
nom, Pape & Confesseur.

28.
Iuin.

PAR la mort du Pape Agathon, Leon II. fut esleu en son lieu: Il estoit fils de Paul, Sicilien de nation, aussi bien que son predecesseur. C'estoit vn homme saint, Docte, vigilant & agreable, & sur tout grand Musicien. Du temps d'Agathon, on auoit assemble vn Concile en Constantinople, qui fut le sixiesme general, sous l'Empereur Constantin quatriesme. Le saint pape Leon le confirma, & le translata luy-mesme de Grec en Latin: Il confirma aussi les autres Conciles generaux, qui auoient este faits auparauant, & condamné les erreurs & heresies qui y auoient este condamnées. Il escriuit vne lettre fort graue & affectiue à l'Empereur, le loüant & congratulant du zele qu'il auoit apporté à la celebration de ce Concile, pour establir la paix en l'Eglise, & en bannir les scandales & erreurs qui la troubloient. Il faut pourtant remarquer que le Cardinal Baronius doute fort de la verité de ceste Epistre, & des autres qui se voyét sous le nom de Leon II. Ce fust le premier qui ordonna qu'on donnast la paix à la Messe à tous ceux qui y assistoient: car encore qu' auparauant luy, on eust accoustumé de la bailler, comme l'on remarque en S. Denis Areopagite, & en S. Iustin martyr, & en S. Chrysostome: neantmoins ç'a esté luy qui en a fait vn decret & ordonnance. Il se monstra plein de courage & de valeur contre les Archeuesques de Rauenne, lesquels sous la faueur des Exarches & Gouverneurs des Empe-reurs de Constantinople, qui demouroient d'ordinaire en ceste ville-là, s'enfioient & esleuoient tellement, qu'ils ne vouloient recognoistre ny obeyr aux papes de Rome. Nostre Leo pour rabatre cet orgueil & insolence, fit vn decret, par lequel il deffendit qu'aucun Euesque de Rauenne ne peust exercer l'Office de prelat, qu'il n'eust esté prealablement confirmé par le pape. Il commanda aussi que le marteau qui s'enuoye de Rome aux Patriarches & Archeuesques, & les Offices Ecclesiastiques, se donnassent gratis, & sans en retirer aucun emolument. Il fit bastir vne Eglise à Rome, ioignant sainte Bibienne, laquelle il dedia à l'Apostre S. Paul, & y mit les corps des saints Simplician, Fauste & Beatrix, & d'autres saints. S. Leon trouua le plein chant fort corrompu, lequel auoit esté composé par S. Gregoire le Grand. Il reforma la Musique des psalmes, & autres chants Ecclesiastiques: il composa quelques Hymnes, & mit ceux qui se chantent à l'Eglise en beau chant, & en la douce harmonie qui y reste encore à present: il tint vne fois les Ordres, où il fit 23. Euesques, 9. prestres, & 3. Diacres. Il estoit fort aimé & respecté d'vn chacun, à cause de ses heroïques & admirables vertus, joint que de son naturel, il estoit fort doux & paisible, liberal & misericordieux aux pauvres, & fort Religieux en toutes choses. Rien ne luy manqua pour estre mis au rāg

des plus excellens Papes qui ayenciamais este en l'Eglise, que la trop courte vie: parce qu'au dix-huit me mois & huit iours de son Pontificat, selon la supputation du Cardinal Baronius, & du Breuiere Romain, reformé par Clement 8. d'heureux memoire, il deceda le 28. Iuin, l'an de nostre Seigneur 684. auquel iour l'Eglise celebre sa feste. Son corps fut enterré en l'Eglise de saint Pierre.

LA VIE DE SAINT IRENEE
Euesque & Martyr.



ECUMENE & Anastase Sinayte, Patriarche d'Antioche, disent que S. Irenée Euesque de Lyon, auoit esté tres sage, & tres-braue Martyr de nostre Seigneur, estoit Lyonnais de nation: neantmoins il est plus croyable qu'il nasquit en Asie, parce qu'il est en luy-mesme, qu'estant petit garçon, il auoit oy prescher S. Polycarpe Euesque de Smyrne, qui auoit esté disciple du bien-aimé Apostre de nostre Seigneur, & fréquenté par rapias & autres personnes Apostoliques de ce bien-heureux & riche temple: voila pourquoy saint Hierosme l'appelle le me du temps des Apostres; & Tertulian, le tres-diligent chercheur de toutes les bones lettres, & saint Epiphane, le tres-saint & tres-ancien Theologien, & successeur des Apostres. Pour ce bien estre que ceux qui l'appellent Lyonnais, ne veulēt pas inferer qu'il soit nay à Lyon, ains parce qu'il fut Euesque de Lyon, où il fut enuoyé de l'Asie, par son maistre saint Polycarpe, afin d'elclairer ceste ville de la lumiere de l'Euangile; ce qu'il fit merueilleusement bien, l'instruisant de la doctrine celeste, & l'eschauffant de sa tres-sainte vie, de maniere, que comme dit saint Gregoire de Tours, en peu de temps il la conuertit toute à la Foy de nostre Redempteur Iesus-Christ par sa predication: Car saint Irenée auoit vn esprit rare, beaucoup de bonnes lettres, & sur tout vn entendement Apostolique & diuin, tel que pouuoit estre celuy qui auoit beu de ceste fontaine sacree de Polycarpe, Papias, & autres disciples des Apostres de nostre Seigneur.

De son temps, lors qu'il n'estoit encore que prestre, il y eut plusieurs saints Martyrs à Lyon, qui moururent valeureusement pour la Foy de nostre Seigneur Iesus-Christ, & il se presenta des affaires d'importāce, & des questions Ecclesiastiques, pour raison desquelles l'Eglise de Lyon enuoya son prestre saint Irenée à Rome, afin d'en conferer avec le Pape saint Eleuthere, qui presidoit lors à l'Eglise vniuerselle de nostre Seigneur: auquel les saints Confesseurs qui estoient enchaînez dans les prisons, avec tout le Clergé & l'Eglise de Lyon, escriuirent vne lettre par le moyen de saint Irenée, par laquelle ils rendirent vn si digne tesmoignage de leur insigne sainteté & doctrine, & des autres parties aduantageuses que Dieu leur auoit données pour sa plus grande gloire, & le bien de son Eglise. Estant arriué à Rome, il fut

il fut fort bien receu du saint Pontife Eleuthere, & conclud heureusement les affaires qui le menoi-
 28. noient. Entr'autres occupations pendant son sejour s'adonna à rechercher les ceremonies, coutumes & traditions de toute la discipline ecclesiastique, que les glorieux Princes des Apostres S. Pierre & S. Paul auoient enseigné à l'Eglise Romaine, & qui du depuis s'y estoient conseruées de main en main: d'autant qu'il estima que les traditions Apostoliques sont de fortes armes contre les heretiques, & contre les nouuelles inuentions erronnées des pauvres desuoyez. Quelques-vns tiennent que saint Irenée passa lors de Rome en Asie, comme député de l'Eglise de Lyon, qui s'attroit des heresies nouuellement esleuées en ceste Prouince-là, & desiroit qu'un si grand personnage qu'Irenée y peust apporter quelque remede. & fit entendre aux Catholiques qu'ils doiuent viure en vnion, & qu'estans tous membres d'une mesme Eglise, nous deuous compair, & ressentir chacun en particulier les travaux des vns & des autres, specialement en matiere de la foy. Peut bien estre que S. Irenée aila pour ceste occasion en Asie, neantmoins, ny Eusebe en son hystoire, ny S. Hierosme, parlant de luy, n'en font aucune mention.

Le saint estant de retour de Rome à Lyon, ou son saint Euesque Pontian aagé de nonante ans, auoit esté martyrisé, Irenée, par la volonté de Dieu, & consentement de tout le peuple Chrestien, fut esleu en son lieu, Pere & Pasteur de ceste Eglise, en laquelle il trouua beaucoup, & y fit un grand fruit par sa tres-sainte vie, par ses escrits, & par le sang qu'il respandit pour Iesus-Christ, en premier lieu, il tascha de rallier son troupeau, qui auoit esté escarté & deschiré par la persecution, d'encourager les foibles, de retenir ceux qui trebuchoient, de releuer ceux qui estoient tombez, de consoler les affligez, de secourir les necessiteux, & de remedier à tous ceux qui en auoient besoin, par ses conseils, par ses ceures & remonstrances. Le saint Prelat ne se contenta pas de bien gouverner son Eglise, & nourrir le troupeau que Dieu luy auoit baillé en charge, ains la charité, le feu de l'amour diuin embrasoit tellement son cœur, qu'il tascha d'extirper le Paganisme des Prouinces circonuoinnes & de les faire cultiuer par les mains des laborieux Euangeliques. Pour cet effect, il enuoya en la ville de Befançon Feriole Prestre & Ferucion Diacre: & en celle de Valence, Felix Prestre, Achilée Diacre, & Fortuné, pour illuminer ces peuples de la splendeur de la doctrine Euangelique, & en les deliurant de la tyrannie de sathan, les assujettir au plaisant ioug de Iesus-Christ: & d'autant que de son temps plusieurs heretiques faisoient la guerre à l'Eglise Catholique, que Valentin Marcion, & autres semblables monstres la vouloient infecter, saint Irenée print la plume, & escriuit diuinement en Grec contr'eux, destruisant leurs tenebres & erreurs, par la declaration de la vraye & sincere doctrine, qu'il auoit apprise des hommes Apostoliques, lesquels comme nous auons dit) auoient esté ses maistres: et afin

que ses liures fussent fidellement traduits il y mit à la fin vne clause que j'ay bien voulu rapporter icy, comme estant rare, & d'un si grand saint: ^{28.}
 I VIN. *Te vous coniare, dit-il, vous qui traduirez ce liure, au nom de nostre Seigneur Iesus-Christ, & par son glorieux aduencement, lors qu'il viendra iuger les viuans & les morts, apres que vous l'aurez entierement traduit, de le conserer & corriger diligemment sur l'original, d'où vous l'aurez tiré, & qu'en vostre version vous y employez ceste mienne requeste & protestation, comme elle est dans l'original.* Il tesmoigna encore en d'autres choses son grand zele, son esprit, & sa prudence, parce que s'estant agité opiniastrement vne question en l'Eglise de Dieu, du temps auquel on deuoit celebrer la Pasque: quelques Eglises d'Orient, & plusieurs tres-saints & grands personnages voulans qu'elle se celebrast le quatorziesme iour de la Lune de Mars (ainsi que nostre Redempteur Iesus-Christ la celebra, selon l'ancienne Loy, & comme font encore à present les Iuifs) d'autre costé saint Victor Pape, qui estoit desia Vicair de nostre Seigneur en terre, commandant qu'elle se celebrast le premier Dimanche ensuiuant, auquel nostre Seigneur estoit resuscité, à cause que le Prince des Apostres saint Pierre l'auoit ainsi enseigné, & de peur de nous conformer aux Iuifs. Ceste dispute & controuerse s'eschauffa tellement que le Pape saint Victor fut sur le point d'excommunier tous ceux qui estoient de l'aduis contraire: neantmoins S. Irenée s'interposa au milieu, & supplia le pape de retenir son iuste zele, maniant peu à peu ceste affaire si importante, qu'au lieu de retrancher tout à net les membres de l'Eglise, il seroit plus à propos de tascher à les guarir, avec suavité & douceur. Il escriuit aussi aux Prelats & Eglises, qui renoient le party contraire, qu'ils obeyssent au souuerain Pasteur, se soubmettans à ce que l'Eglise Romaine (qui est le chef & la maistresse des autres) ordonnoit: par ceste prudence diuine il fleschit le Pape, il rangea les rebelles sous son obeyssance, & fit si bien, que la tradition Apostolique & l'usage de l'Eglise Romaine demoura en sa force & vertu, sans aucun scandale, ny diuision. Apres qu'il eut gouverné long-téps son Eglise, reluisant en sainteté, en science, & en merites, sous les empereurs Marc Antonin le philosophe, Commode son fils, & Beatrix: ce grand ennemy des Chrestiens, Septime Seuere succeda à l'empire, qui esmeut la cinquiesme persecution contre l'Eglise, laquelle fut tres-cruelle, specialement à Lyon, & es environs, où Seuere auoit esté gouverneur auparauant qu'il paruint à l'empire. Ce cruel & seuer empereur respandit tant de sang Chrestien, que S. Gregoire de Tours afferme que les ruisseaux de leur sang couroient le long des rués de Lyon; & saint Irenée, comme braue & vigilant Pasteur mourut en ceste persecution, & presque tous ceux de la ville, l'an de nostre Seigneur, selon le Cardinal Baronius deux cens cinq, ce saint Prelat estant aagé (comme d'aucuns ont escrit) de quatre vingts dix ans, apres auoir gouverné ceste Eglise soixante ans. Le saint endura plusieurs horribles

28.
IWIN.

tourmens auât que d'estre massacré le vingt-huitiesme de Iuin, auquel iour l'Eglise celebre son martyre, & qu'il est corté par les quatre Martyrologes. Son cops fut recueilly par vn Prestre nommé Zacharie, lequel le deposa en vn certain lieu le plus honorablement qu'il peut; & lors que les Chrestiens furent en repos, il fut tenu en grande reuerence dans la ville de Lyon, iusqu'à ce qu'en l'an 1562. par le mal-heur des guerres ciuiles, les huguenots firent sentir leur fureur aux saintes Reliques, deuant lesquelles les diables tremblent & apres auoir pillé dans Lyon la chasse de saint Irenée, ils ietterent les ossemens dans le ruisseau, & roulerent sa teste par les ruës, laquelle en fin ils laisserent dans vn esgout, d'où elle fut secretement retirée par vn Chirurgien qui la garda en sa maison, iusques à ce que les troubles estans finis, l'Archeuesque, avec le Clergé, & les Officiers de la ville de Lyon, ramasserent ses reliques des lieux où elles estoient, & les porterent en vne procession generale dās l'Eglise dediée sous son nom comme rapporte Feu-ardant Cordelier en la vie de saint Irenée, qui est au commencement des doctes Annotations qu'il a fait sur ses œuures. Il est parlé de luy dans Tertulian, Eusebe, Epiphane, saint Hierosme, Gregoire de Tours, Ecumene adon Viennois, és Martyrologes & autres auteurs cy dessus nommez.

La Vigile des Bien-heureux Apostres Saint Pierre & Saint Paul. A Rome se fait la Feste de Saint Leon Pape, second du nom, & successeur de Saint Agathon, homme de tres-sainte vie: & qui a beaucoup travaillé pour l'Eglise vniuerselle. A Lyon Saint Irenée Euesque & Martyr: lequel comme escrit Saint Hierosme, fut Disciple de Saint Polscarpe, Euesque de Smyrne: & voisin du temps des Apostres: & apres auoir beaucoup combattu contre les heretiques, & de bouche & par escrit, durant la persecution de Seuer, fut couronné du Martyre avec vne bonne partie des habitans de la ville de Lyon. En Alexandrie durant la persecution du mesme Seuer, endurerent les Saints Martyrs Plutarque, Serain, Heraclides, qui estoit encore Cathecumene: Heron nouvellement conuert à la Foy, & vn autre Serain: Rhais Cathecumene, laquelle recut le Baptesme du feu, & tous ensemble le Martyre, Potamiene & Marcelle sa mere. Entre tous les autres, Sainte Potamiene fut la plus remarquable, d'autant qu'ayant enduré vne infinité de tres-griefs & tres-cruels tourmens pour sa Virginité, & puis pour la Foy de nostre Sauueur, fut en fin bruslée avec sa mere Marcelle. A mesme iour deceda Pape Martyr lequel durant la persecution de Diocletian, ayant esté battu d'escoyées, & ietté dans vne chaudiere pleine d'huyle & graisse bouillante à grosses ondes, & enduré plusieurs autres horribles tourmens, eut en fin la teste tranchée. A Virech deceda Saint Benigne Euesque & Martyr. A Rome Saint Paul, qui fut successeur de Saint Estienne second du nom.

LA VIE DY PRINCE DES
Apostres, Saint Pierre.

29.
IWIN.

NOUS tirerons le discours de la vie du glorieux Apostre saint Pierre, principalement des Euangiles, & des Actes des Apostres descrits par S. Luc, enséble des autres auteurs anciens qui traitent de ses admirables vertus. S. Pierre estoit Hebreu de la Prouin-

ce de Galilée, natif de Bethsaïde, & marié avec vne femme nommée Perpetuë (comme l'on tieut) laquelle estoit fille d'Aristobule, frere de saint Barnabé. Saint André estoit son frere aîné: ils estoient tous deux Pêcheurs. Saint André eut cognoissance de Iesus-Christ par des propos qu'il en ouyt tenir à saint Iean Baptiste son maistre: il le suiuit, & alla avec luy iusques en la maison où il demuroit: il demeura vn iour avec nostre Seigneur tout rauy de sa diuine parole, & ayant entendu de luy qu'il estoit le Messie que tout le peuple d'Israël attendoit, il alla querir son frere Pierre pour le faire participant du bien qu'il auoit trouué, & l'amena à Iesus-Christ. Nostre Seigneur voyant saint Pierre luy dit son nom, celui de son pere, & qu'il changeroit de nom, *Tu es Simon, fils de Iean, tu auras nom Cephas*; qui en l'anguë Syriaque, ou Chaldeenne, signifie pierre: Nostre Seigneur donnant par là à entendre que tout ainsi qu'il est la premiere pierre fondamentale, sur laquelle tout l'edifice de l'Eglise est basti: de mesme il deuoit communiquer son nom & les proprieté à Pierre, afin que sur ce second fondement, ferme & solide, tous les autres fidelles, comme des pierres viues, fussent establies & fondées en son Eglise, d'vne liaison si inuioable, que toute la force & le pouuoir d'enfer ne la peuuent renuerser, ny esbranler. Saint Pierre ne demoura pas lors avec nostre Seigneur Iesus-Christ iusqu'à quelque temps de là, que se promenant sur le bord de la mer il le trouua pèchant avec son frere André: Alors il les appella, & leur dit: *Suuez-moy, & ie vous feray pècheurs des hommes*. Ils obeyrent incontinent à la vocation de nostre Seigneur, laissant leurs rets & leur cabanne, & toute affectiō mondaine pour le suiure, & faire la vōlonté de leur maistre. Nostre Seigneur Iesus-Christ fit tant de faueur à saint Pierre, que tous les autres apostres le recognoissent comme leur frere aîné, & les euangelistes, qui au de nonbrement des autres, les enroolerent confusement & diuerfement, mettent tousiours saint Pierre le premier, comme le chef de tous sans y faillyr. C'estoit celuy qui acompagoit tousiours nostre Seigneur Iesus-Christ, mesme és actions les plus secretes, comme en la Transfiguration de Tabor, & lors qu'il ressuscita la fille de Iaire, Prince de la Sinagogue, & quand il se retira à part pour prier au iardin d'Oliuet. Ce fut en sa barque que nostre Seigneur entra pour pècher au peuple qui estoit sur le bord de la mer, & laissa toutes les autres pour nous faire entendre que la doctrine celeste & euangelique, deuoit estre enseignée de la nacelle de saint Pierre. Bref, Pierre fut celuy que nostre Seigneur esleut pour estre son Vicare en terre, vniue & vniuersel Pasteur de toute son eglise, auquel il deliura les clefs de ses tresors, & la dispensation du prix inestimable de son sang, & de nostre redemption: & afin de le rendre digne d'estre son Ministre & Pasteur, il le decora de toutes les graces & vertus dont il auoit besoin. Il luy donna vne grande humilité, car ayant ietté ses filets au lieu où nostre Seigneur luy auoit dit, & amené vne grande quantité de poissons, quoy